

2 Kolini

Polo'a Masetonia maineno Kolini kumate maine'ya Yisasina amaku'a aminaya veafe havino mani avona kaeno amamine. Yisasi'a faliteno hetino ikapinaga haitegeno Polo'a tueti fo'a (24) kafu agava maineno 2 Kolini kea kae-malene.

¹ Nagaila Polonia Anumaya Koti'a hapalinateno Aposolo kano maiyo huno hunatene. Nelafu'a Timoti'ene mani avona negao'e.

Tamakai'fe nehu'e. Tamakaya Anumaya Koti anagala Kolini kumate mainetama agai kema havigahe melitalu hutama nemaiya veafe'ene Akaiya kotega maine'ya Yisasife havi'ya amakupi malenaya vea'nene'fe huta'a mani avona negao'e.

² Anumaya Koti'a Nelafa'ene Yisasi Kalaisi Anumayatimo'ene kayone yama'aene tamaipa falu hisia ya'ene tamamisa'e hu'na Anumayamotega havige'na mani avona negaove.

Anumaya Koti'a aya humainea yafe Polo'a huno muse hutene.

³ Musena hune'ateta Anumaya Koti agia alisaga nehuta maisune. Anumaya Koti'a Yisasi Kalaisina Nefa'agino kalagi aimate yamona aepa'a maineafe muki'a vea'mogatina taipamo'a kanale hisia yamona aepa'a nagoke maineanagino ani yana hunelate.

4 Tagaya muki'a kana yama alunageno'a Anumaya Koti'a taipa kanale hulatesia yana nelamie. Tamineafe tagaya ani'a huta nago'a vea'ma kana yama falote humatesigeta Anumaya Koti'a tayama hia kava huta veala amaipa alita kanale humatesunafe tagaite'ma falote humainea avamete kana yana falote humaine.

5 Yisasi Kalaisite'ma kasago'ya kana yama falote humainea avamete huno tagaipina kana yana falote nehiafe Kalaisi'ene ailokaeta main-onanagino agaya tusiya huno taipamona alino kanale hunelate.

6 Tagaite'ma kana yama falote hisigeta tamakaifena, tagaya tamaipa ali kanale hulamatesuna yafe falote nehie. Tamakaila tamaku tamamema aligatisiafe falote nehie. Falote'ma hia kanafina Anumaya Koti'a taipamona alino kanale hulatesigeta tagaya tamaya hisunafe taipa alino kanale hunelate. Tagaite'ma falote humainea avamete kana yana tamakaya aligeno Anumaya Koti'a tamaya hinageno tamaipamo'a kanale hisigetama mailava hutama mai lokiya vaitama maigahae.

7 “Tokiya'age hu'ya maigahae.” huta tamakaifena tusiya huta tametitia nehune. Tagaite'enema kana yama folote hia kanafina Anumayamo'a tagaila taipa alino kanale hulatenea avamete huno tamakai tamaipa alino kanale hulamategahie huta nehune.

8 Esia kotega kana yama alimainona yafena nafu'naganatama hu'na lamakesa hugahe tamahapaigahue. Tusiya huno kana yana tagaipina

falote higeta tokiya vaita maisuna tokiyatia omalegeta “Faligahune.” huta humainone.

⁹ Humainonanagi tagaya kanale'ya huta maisuna tokiyatia omaleneanagita ani lokiyahena tametitia ohisunagi Anumaya Koti'a fali vaya'ma alino heti-ne'amatea kanomofe tametitia hisunafe ani avamete kana yana falote humaine.

¹⁰ Ani kotega tahaesageno tusi lagata aisigeta fali-mainesuna yapiti Anumaya Koti'a taugafa aligatiteno haenaga'a eteno nago'ene taugafa aligatigahie huta tametitia nehune.

¹¹ Tametitia nehunagi tamakaya laya hutama Anumayamotega ke hutama havigegenon laya hino. Taya hisige'ya muki'a vea'mo'ya anima taha'maesia yana agete'ya muki'a vea'mo'ya havigaya kema havisaya yafena Anumaya Kotina muse hutegahae.

Polo'a Kolini vea'nea havigea hamaopaine.

¹² Nagaya Yisasi kema nohaviya vea'nene tamakai'ene ailokae'na maine'na alu aotage kano mainogeno Anumaya Koti'a kayone yama'a namige'na fatago hu'na maine'na ma mopale havi'ya'ami hanea vaya'mogami ke kana kea nohue. Ani yafena nagesa havuana nagu'amo'a “Havi kava nehane.” huno ohia yafena muse nehue.

¹³⁻¹⁴ Nagi menia hapalitama havilama hisaya kege'ya avopina negaove. Menia muki'a aepa'nia havilama nohayanagi haenaga'a havilama hisae hu'na nametitia nehue. Yisasi Kalaisi'ma eteno esia yupa aepa'nia havilama

hutetama tagaya tamakaifema muse nehuna avamete hutama tamakaya tagaifena musena hugahae.

¹⁵⁻¹⁶ Nagai'fena muse hugahae hu'na nameti-tia nehu'na Masetonia ugahe hagote'na maine-salega mo lamavatagige'na Masetoniatila ete'na egahe tole yupa tamaya hugahe me lamakeme evisuafe nagaila naya hisae hu'na nagesa nehavue.

¹⁷ Ani kema hute'na o'u'nama mainoa yafena “Havige huno ayelavataga hie.” hutama tamakesa havimainao? Nagaya nagesa havi'na “Na'la ma'la hu'na ali'yana aligahue.” hute'na atafa naipamo haiya yafe “E.” hute'na haenaga “A'ao.” nehuo? A'ao na'la kavala nohue.

¹⁸ Anumaya Koti'la ago'ma humainea kea fatago huno hugahie. Nagai'enena fatago hu'na havigea ayelamavataga ohugahue. Tamahapai-mainoa kea nago yupa “E.” hute'na haenaga “A'ao.” hu'na ohunoane.

¹⁹ Yisasi Kalaisi'la Anumaya Koti nafa'nemo'la havige huno ayelavataga hisia kanoa omaine. Nago yupa “E.” huteno haenaga “A'ao.” huno ohuneane. Fatago kege'ya huno “E.” nehia kano maine. Sailasi'ene Timoti'ene nagai'niene tamakaipina Yisasi Kalaisi kea mo lamahapai-mainone.

²⁰ Tamahapaunageno Anumaya Koti'la “Hulamategahue.” huno hulokiya vai-malenea kemono aepa'la Yisasi'la agai'la maineanagino ani kehena “E, hulamategahue.” huno agai'la humaineafe Anumaya Kotifena “Tamage nehie.”

huta nehuta agia alisaga nehune.

²¹ Agia alisaga nehunageno Anumaya Koti'a agai'a tavaleno tagai'ene tamakai'ene Kalaisi'ene aiga'maelateno “Tokiya waitama maiho.” huno hunelate. Ani kema huhaleta hisunafe tagaila hapalilatene.

²² Hapalilateno “Tamakaya nagai anaga mainae.” huno humainea kema havisaya yafe agai'a Avamula tagu'afina faetene. Faetegenon tagu'afina maineafe tagayama havunana “Haenaga'a kanale'ya huta maigahune.” huta nehune.

Polo'a amakaitega aupala uva'yi ohunea aepa'a hamapai-mainae.

²³ Nagaya kelamama-kisugeno tamaipamo'a haviya huyafene hu'na Kolini kumatela nago'ene uva'yi ohunoe. Anumaya Koti'a nagesa havua yana ago havimaineanagi'na agai aufina tamage nehue.

²⁴ Tamakaya Anumayamofena havitama lamakupi maletama tamametiti humainaya kemona atafa hutama tokiya'age hulinayafe menia kahegi kea huta kava hu notamatonagi muse hutama tamaipa kanale yapi maisayafe mani kea nehune.

2

¹ Tamakaitega ete'nama esuana kelamama-kisugetama tamaipa haviya huyafene hu'na nago'ene o'ugahue hu'na humainoe.

² Nagaya hisua kemo tamaipa ali haviya hisige'ya ta'ya nagaila muse yani'a namigahae?

Tamakai tamaipa haviya hisia yama tamamisua vea'mogatamage muse yana namisaya vea'nea mainae.

³ Tamakaitegama visua yupa kea otamama-kisuafe mani avona ago kae'na tamaminoe. Tamakaya muse yama namisaya vea'ne mainagi havigu kelamama-kisua yamo tamaipa haviya hisigeno naipamo'ene haviya hu yafene hu'na aupala omenoe. Tamahapai-mainoa kefo yana ago ali fatago hugahae hu'na nagaya musema hisua yana ailokaeta nagopi musena hugahune hu'na nehue.

⁴ Tusiya hu'na tamakaifena nagesa nehavugeno naipamo'a kana'age nehige'na avi ne'ate'na ani avona ago kae'na tamaminoe. Tamaipa haviya hisie hu'na okaenogi "Tagaifena aluya huno haigeno mani avona lamie." hutama hisayafene hu'na ani avona ago kae'na lamaminoe.

Kolini vea'mogatama kefo yama hisia kanomona aige'atetama kefo yama'a ataleteho.

⁵ Tokaetama mainaya vayapiti nago kanomo'ma kefo yama hia yafe naipa havi'na haviyama huana nagai'nigelomagi tamakai'ene muki'amogatamina tamaipamo'a tusiya huno haviya nehie. Haviya nehianagi ani yafena muki'a kea ohisua nagesa nehie.

⁶ Tamaipamo'a haviya higetama ani kanomona "Kefo ya nehane." hutama havi anona'a hu ne'atayafe ani kefo yamo anona'a ago alimaine.

⁷ Ali-mainefafe aige'atetama kefo yama'a ataletetama aipa alitama kanale huteho. Havigu agaye yamo kana ya amisigi kanale kava huteho.

⁸ Alitama kanale hu ne'atetama “Kagaifena aluya huno nelahaiye.” hutama huteho hu'na tokiya'age ke nehue.

⁹ “Kanale'ya hutama muki'a ke'nia havitama akave nemalao ifi nomalao?” hu'na nagaya tamakaila avame hulamate'na ani avona ago kae'na lamaminoe.

¹⁰ Nago kanomona aige'atetama kefo yama'ama ataletesayana nagaya ani'a hu'na ani kanomona aige'ate'na kefo yama'a atalene'atoe. Nago kanomona aige'ate'nama kefo yama'a ataletoaana tamakaifene hu'na Kalaisi aufina ani'a humainoe.

¹¹ Na'a ohisugeno'a Satani'a ayelavataga huno tatafa hugahie. Agai'a havige huno ayelavataga hisia yafena ago havilinone.

Polo'a Taitasi agegahe humaine.

¹² Kalaisifena kanale mono kema huhale'na hugahema Taloasi kumate uva'yima hugeno'a Anumayamo'a anile mainaya vea'mogamina amaku'a alino aikalo hige'na kanale'ya hu'na ani kea huhale'na humainoe.

¹³ Huhale'na huanagi nenafu'a Taitasi'a omaige'na agaiife nagesa ku'mo hige'na amatale'na atiyegahe Masetonia umainoe.

Anumaya Koti tokiyaleti agai ali'yama ne'aliya vaya'mo'ya Satanina agase-mainae.

14 Kalaisi¹a Satani ayapitila tavalegeta agai¹ene ailokaeta mainonanagita muki¹a kefo yana agaseta mainona yafe Anumaya Kotife muse huta agia alisaga hisune. Agaya tagaila laya higeta alule alule vaiyeta Yisasi kema nehuna yafena ani kemona havilama hageno kanale mana¹age yamo hia kava huno ute ete nehie.

15 Higeta lagaya Yisasi kema nehuna vea¹mogata Kalaisi¹ene ailokaeta mainonafe kanale mana¹age yamo hia avamete hunageno Anumaya Koti¹a muse nehie. Ani mana¹amo¹a ute ete huno muki¹a veapi vige¹ya ani mana¹age kea nehavigeno amaku amamema alinegatia vea¹nene kefo yake¹ya hu¹ya hani yapima tegelege nehia atafi visaya vea¹nene ani kea nehaviye.

16 Nehavigi nago¹amo¹ya ani kea havi¹ya “Akave omalegahune.” hu¹ya nehaya veala hani yapi tegelege nehia atafi visaya vea¹mogamife mani kemo¹a fali-mai vea¹mogami mana¹amimo hia kava humainanagi nago¹amo¹ya havi¹ya amakupi malet¹ya “Maige maige hisuna yafe kanale mana¹age nehie.” hu¹ya nehae. Tusi¹a ali¹ya ne¹alunanagi tagaitigela mani ali¹yana o¹alute¹asine.

17 Kasago¹ya vea¹mo¹ya Anumaya Koti ali¹yateti “Miya alisune.” hu¹ya nehagi tagaila Anumaya Koti¹a hulategeta fatago huta kelamagama huhaleta hunana Kalaisi¹ene ailokaeta maineta Anumaya Koti aufina mani kea huhaleta nehune.

3

Aposolo vayala haegafa alino hagelafi-latenea kemo ali'ya vaya mainae.

¹ Tagaya nago'ene tagaiti laugafa alita haisuna yafe mani kea nehuno? A'ao na'a nohune. Tagaifema ohaviya yafe mani kea nehuno? Nago kanomofe avopina “Kanale kano mainegi agai kea haviho.” hu'ya kae-malenaya kea ali'ya vaiyatete nehagi tagaifena ago havimainaya yafe tagaya ani avamete avona alita vai no'ayone. Tamatale'na visuana “Ani avamete avona namiho.” hu'na ohugahue.

² Ohugahugi tamakaya tagai kea havitetama tamaku'a ago aiyahae hage'ya muki'a vea'mo'ya nelamake'ya tagaifena “Anumaya Koti kea fatago ke nehae.” hu'ya nehagetama tagai avo kana hutama mainageno tagupina hane.

³ Nagaya tamaya hu'na Kalaisifena tamaha-paugeno Kalaisi'a ani avona tamakaife huno vea'mogami amakupina kae-malene. Oko titetila yafamona amega okaenegi haimu'a hanea Anumaya Koti'a agai'a Avamuteti vea'mogatami amakupina ani avona kae-malegetama Kalaisi avo kana hutama mainayafe muki'a vea'mo'ya hapali'ya nehaviye.

⁴ Kalaisi'a tayama hia yafe Anumaya Kotifena tametiti nehuta mani kea nehune.

⁵ Nehunanagi “Mani ali'yana tagaitige ali-mainone” huta nohunagi Anumaya Koti'a tokiya lamigeta mani ali'yana ne'alune.

⁶ Anumaya Koti¹a kosa helatesia tokiya¹a tamineafe Anumaya Koti¹a haegafama alino hagelafi-latenea kema hamapaisuna yafe hulatene. Anumaya Koti¹a hagoteno kahegi kea yafate kae-malenege¹ya vea¹mo¹ya akave malesaya amakesa haviyanagi tokiya¹amia omalege¹ya ago alitagae-mainaya yafe fali-mainae. Fali-mainagi Avamu¹mo¹a anima haegafama alino hagelafi-latenea kea taveliteno haegafa yama alita maige maige hisuna tahaimula nelamie.

⁷ Nelamianagi hagote kahegi kema akave omalaya yafe ani kemo¹a hamaege¹ya fali-mainae. Ani kahegi kea yafate kaeteno amaminea yupa Anumaya Kotitegati tokiya hale yamo¹a falote huno Mosese augosafina tusiya huno aihalea yamo Isaleli vea¹mogami amaulaga ayeno haviya hige¹ya Mosesena o¹agageno ani tokiya¹age hale yamo¹a osi¹a maigeno fanane humaine.

⁸ Meni kanafina Alu Aotage Avamu¹mo¹ma taya nehia ali¹yamo¹a nayo kahegi kemona agaseno tusiya huno tokiya¹age hale yamo¹a falote humaine.

⁹ Hagote kahegi kema akave omalageno hefalimatenea kea tusi¹a tokiya¹age hale yama¹aene kema hanesiana Anumaya Koti aufina fatago huta maisuna kea hagote kemo hale yamona ago agaseno tusi¹a tokiya hale yama¹aene kea hane.

¹⁰ Tamage tusi¹a tokiya hale yama¹ama hanea kema falote humaineafe hagoteno falote humainea hale yamona agase-maineanagino menia hagote kahegi kemo¹a aye hale olatene.

¹¹ Fananema humainea kahegi kemo'a tokiya hale yama'aene hagoteno falote humaineanagi menima agola maige maige hisuna kemo'a tusi'a tokiya hale yama'a hanea ke hane.

¹² Ani kemo'a “Agola hanege hanege hugahie.” huta tametitima nehuna yafe kolia huta fala okita ani kege'ya huhaleta nehune.

¹³ Nehuta fala'nokunagi Mosesena augosafima tokiya hale yama fanane hisige'ya Isaleli vea'mo'ya o'agesayafene huno augosafina kenaletila alino fala kige'ya o'agenae. O'agenayanagi tagaya Mosese'ma humainea avamete huta Anumayamo kea fala nokune.

¹⁴ Fala nokunagi Mosese'a kenaleti augosafina alino aiso humalenea avamete huno Anumaya Koti'a Isaleli vea'mogami amaku'amona alino ha'yagino atalako hige'ya havilama ohunae. Nagi nayo'ene meniene Anumaya Koti avopima hapaliyana kenaleti aiso humalenea avamete huno amaku amamemo'a aiso humainege'ya havilama nohagi nago'a vea'mo'ya Kalaisi'ene ailokaesayana ani amaku amamema ali'ya aiso humalenaya yana Kalaisi'a alitalege'ya havilama hu'ya nehaviye.

¹⁵ Tamage menienema Mosese kahegi kema hapali'yama haviyana amaku amamemo'a kenama Mosese'a alino augosafi aiso humainea avamete hige'ya havilama nohae.

¹⁶ Havilama nohagi nago'a vea'mo'ya amaku'a aiyahae hu'ya Anumayamotega visayana ali'yama aiso humalenaya yana Kalaisi'a

alitalenage¹ya havilama hugahae.

¹⁷ Nagi Anumayamo¹a Alu Aotage Avamu maine. Anumayamo Avamula tagai¹enema mainesiana tagu¹ama alino aiso hulateno aigagilatenea yana aligalu helateneafe nago¹ene kahegi kemo akavela omalegeta nofipi mainaya veya kana huta nago¹ene omainone.

¹⁸ Taugosafi aiso humainea yana omalegeno Anumayamo tokiya hale yamo¹a lagai taugosafi aye halege¹ya vea¹mo¹ya nelage¹ya Anumayamo tokiya hale yama¹a ne¹agae. Avamu¹mo¹a agai avamete vea¹ne maisunafe tagaila alino hapaelategeta agai¹a tokiya hale yana alime alime nehaune.

4

Aposolo anagala mopa susufane kana humainae.

¹ Anumaya Koti¹a kalagi ailateno “Nagai kea huhaletama hiho.” huno hulateneafe “Kasalotahae.” huta nohune.

² A¹ao ani ali¹yama alunana falakita tagaye hisifa kavala huta veala aye-mavataga huta Anumaya Koti kea alita aiyahae huta “Mage nehie.” huta havigea nohunagi hulama huta huhaleta nehune. Anumaya Koti aufina vea¹mogamina kelamagea hamapaunage¹ya muki¹a vea¹mo¹ya amaku¹aleti “Lamage nehae.” hu¹ya nehae.

³ Nehagi Yisasifena kanale mono kema huhaleta nehunage¹ya nago¹a vea¹mo¹ya havilamama nohayana ani vea¹mo¹ya hani

yapima tegelege nehia atafi visaya vea'ne mainae.

⁴ Satani'a*, ma mopafi kava yagai-mainea kanomo'a, Yisasi kema nohaviya veala Kalaisi'a kefo ya'amia alino kanale humateno alino halematesia kea ohavisaya yafe Satani'a amaku amakesa alino aye-lileno amaulaga alino asu humainea vea kana humatene. Humategeno Kalaisi'a agai'a tokiya hale yama'a hanea kano maineanagino Anumaya Koti'enena nago avamete hu'ana maina'e.

⁵ Maina'ageta lagaya tagaiti laugafa alita haisuna yafe mani kea huhaleta nohunagi Yisasina Anumaya Koti'a taugafa aligatigahe hutenea kanoa "Anumayati maine." huta tamaya hisunafe Yisasi ali'ya vaya mainone.

⁶ Anumaya Koti'a ika'ene mopaene talo humaleteno "Hani yapitila halo." huno'ma humainea kanomo'a hani yama hanea tagu'afina aye hale-lategeta maineta Yisasi Kalaisi augosafina Anumaya Koti tokiya hale yamo'a hanegeno tave-ligeta age-mainone.

⁷ Age-mainonanagi Anumaya Koti'a agai'age ani ala tokiyamon aepa'a maineafe "Vea'mogamina amave-lisue." huno ani lokiya yama'a tagaila, fulu fulu vea'mogati tagupina malenegeta agai ali'yana ne'alunage'ya vea'mo'ya nelage'ya "Amakaila tokiya'amia omalene." hu'ya Anumayamo agia alisaga nehae.

⁸ Muki'a kanafina alu kana ya alu kana yana tagaitela falote nehigeno'agi tagaila alino haviy-

atafana nohie. Tagesa ku'mo nehianagi tagesa alino haviyatafana nohie.

⁹ Yisasi kema huna yateti ali haviya hulatayanagi Anumayamo'a otatalene. Muki'a kanafina ka'yo kevema lamiyana ofalinone.

¹⁰ Nagi Yisasi'a fali-mainefiti hetimainea haimu'mo'a tagai taugafale hanenage'ya agesayafe “Yisasina haesunageno falisie.” hu'ya hutenaya kavala menia ani'a hu'ya tahae'ya faligahe nehae.

¹¹ Yisasi'a fanane hisia taugafale maineno tokiya'ama nelamia yana amave-lisiafe tagaya ma mopafima mainona kanafina Yisasi kea huhaleta nehunage'ya hamaiya vai-late'ya tahaegahena mai'ya nehae.

¹² Hige'ya Anumaya Koti kema huhaleta huna yafe fali yamo'a tagaipina haneanagi agola maige maige hisuna haimu'mo'a tamakaipina ali'yana ne'aliye.

¹³ Anumaya Koti avopina mage huno kae-maleneane

“Tamage nehie hu'na havi'na nagupi male'na nametiti hu-mainoafe mani kea huhale'na nehue.” huno hige'ya kae-malenayane.

Tagaya ani'a huta “Anumayamo'a lamage nehie.” huta tagupi malenonafe mani kea huhaleta nehune.

¹⁴ Tagaya ago havimainone Yisasi'ene ailokaeta mainonafe Anumaya Koti'a Anumayatimo'a Yisasina fali-mainefiti alino hetitenea kanomo'a tagai'ene tamakai'enena ani'a huno fali-mainesupitila ali hetilateno agai'a mainelega

tavaleno lategahie huta tagesa havimainone.

¹⁵ Tamakai tamaya hisunafe tagaitela kana yana falote nehianagi kasago'ya vea'nele Anumayamo kayone yama'amo'a falote hige'ya ne'agageno Anumayamo'a kasago'ya veala amaya nehianagi'a kasago'ya vea'mo'ya Anumaya Kotifena muse hu'ya agia alisaga hugahae.

Aposolo anaga'mo'ya amametitima haya yateti tokiya ali-mainae.

¹⁶ Nagi amega taugafamo'a haviya hugahe hianagi muki'a kanafina Anumayamo'a taipamona alino haegafa hulategeta Anumayamo ali'yafena “Kasalo tahae.” huta no'atalone.

¹⁷ Tamage menima falote nehia kana yana afa ya kana huno fanane hugahie. Ani kana yama ne'aluna yafe ikapinaga haita maisuna yamo'a, tusi'a ala yane, ohavunama'a kanale tokiya hale yana falote huno hanege hanege hugahie.

¹⁸ Ikapinaga haita maineta alisuna yafena ago havimainonafe ma mopafi yafena tagesa havi havi nohunagi o'agenona yana, haenagama falote hisia kanale yafe tagesa nehavune. Ma mopafi hanegeta ne'agona yana fanane hugahigi no'agona yana, haenagama falote hisia kanale yana afa'a agola hanege hanege huno hanegahie huta nehune.

5

¹ Tagaya ma'a huta nehavune ma mopafi mainona taugafa yugu no kana hu-mainegi falisunageno'a ani nona fanane hisigeno Anumaya

Koti¹a ikapinaga agola hanege hanege hisia no kana taugafa talo tala hulatene. Vaya¹mo¹ya ani nona amayatetila okinagi Anumaya Koti¹a agai¹a kimalene huta ago havimainone.

² Havimainonanagi menia ma mopafi taugafale mainonafe “Kasalo tahae.” huta ikapinaga maisuna taugafa tamisia yafe tusiya huno nelahaiye.

³ Nelahaiyanagi ani laugafa aliteta hakalo kana huta omaigahunagi taugafaene vea¹ne maigahune.

⁴ Maigahunagi ma mopafi mainona taugafalela kana yamo higeta “Avovo.” huta kalagila ne¹aita falisuna yafena notahaiyanagi maige maige hisuna taugafa alisuna yafena aluya huno nelahaiye. Maige maige hisuna tahaimu¹mo¹a esia¹amo haegafa kenama nefaiya avamete huno falino fananema hisia taugafa alino aiso hulate-sigeta agola maige maige hisuna yafena aluya huno nelahaiye.

⁵ Anumaya Koti¹a tagaya agola maige maige hisunafene huno talo hu lateneanagita ani yafena “Tamage nehie.” huta havisuna yafe Alu Aotage Avamula lamine.

⁶ Tamineafe tagu¹amo¹a kolia nohianagita havilama huta havilinone ma mopafi mainona kanafina ikapinaga Anumayamo avatela omainonane.

⁷⁻⁸ Omainonanagi Anumayamona o¹agenona kanafina agaife havita lagupi maleta lametiti humainona yateti ma mopafina vaine¹ayeta ma ma mainona taugafa ne¹ataleta Anumayamo avatela agola umaisuna yafena aluya huno nelahaiye.

⁹ “Ma mopafi mainonano falisunano Anumayamona haisia kavala hugahune.” huta huna yafena aluya huno nelahaiye.

¹⁰ Tagaya muki'a veala nagoke nagoke'mogata Kalaisi aule mo hetisunageno mopale'ma havi au'ava yama humainesuna yafe'ene kanale au'ava yama hu-mainesuna yafe'enena agelama huno fako hulateno tagayama maita nehisuna avamete anonatia tahaote tahaote tamisiafene huta Anumayamona haiya kavala nehune.

Tagaya vea'ma alita Anumaya Koti'ene nago amaiya humatesuna ali'yatia hane.

¹¹ Tagaya Anumayamofena “Koli'a hisuna kano maine.” huta havilineta vea'mo'ya fatago hu'ya maisaya au'ava yana amave-nelune. Anumaya Koti'a lagupina nelageno “Kanale kava nehae.” huno nehio? Ifi tamakaya tamaku'afinaga tagaifena “Kanale kava nehae.” hutama nehao? hu'na nehue.

¹² Mani kea tagaiti lagi alita ala hisuna yafe nohunagi nago'a vea'mo'ya amega amaugafahe havi'ya muse nehu'ya “Fatago kavake'ya nehuna vea'ne mainone.” hu'ya nehayanagi amakupina o'agene'ya ani vea'mo'ya tagaifema tamahavi-gesagetama tagaifena “Kanale kava nehae.” hutama muse nehutama kenona'amia hamapaisayafene huta mani kea nehune.

¹³ Anumaya Koti ali'ya ne'alunage'ya nago'a vea'mo'ya tagaifena “Aifo vaya mainae.” hu'ya nehayanagi ani aifo-nafo kava'ma hisunana Anumayamo agi alisaga hisuna yafe ani kavala ne-

hune. Tamakai tamaya hisunafene huta kanale tagu tagesa nehavita Anumaya Koti ali'yana ne'alune.

¹⁴ Kalaisi'a lagaifena hau ayamopafima nehaiya yamofe huta agai ali'yana ne'alune. Ne'alita nago yafema havunana nago kanomo'a muki'a veafene huno fali-maine. Kalaisi'a tagaife huno fali-maineafe muki'a veala agai'ene tokaeta ago fali-mainone.

¹⁵ Faliteta ago eteta hetita haegafa vea'ne mainonafe tagaiti tahaisia kavala ohisunagi tagaifema huno faliteno heti-mainea kanomona tagu'a amiteta agai'ma haisia kavake'ya hisunafene huno Yisasi'a fali-maine.

¹⁶ Nayona vea'mo'ya nehaya kavafena ageteta amegati fako humainonagi menia Kalaisi'a tagaifema huno fali-mainea kema havuna yafe ani kea nago kanomofena nohune. Nayona Kalaisi'ma humainea kavala ageteta fako humainonagi menia ago havilama huteta ani kavala nohune.

¹⁷ Ani yafe nago'a vea'mo'ya Kalaisi'ene ailokae'ya maiya'amo haegafa veala hapa'e'ya mainageno atafa au'ava amaipamo'a fanane higeno haegafa amaipa alino hapaematene.

¹⁸ Anumaya Koti'a agai'a ani yamona aepa'a maineanagino agai'enena kame vaya'a mainageno Kalaisina hutegenoa'amo Anumaya Koti'ene melino taipa falu hulategeta agai'ene nago taipale mainone. Mainageno Anumaya Koti'a "Nago'a vea'mogamina ani kavala humategahue." huno humaineafe

tagaya amaipa alita agai'ene falu humatesuna ali'yama'a tagaila lamine.

¹⁹ Nelamino “Veala nagai'ene alitama amaipa falu hisia kea mage hutama hamapaiho.” huno mage humaine “Kalaisi'a tamakaifene huno fali-mainea yafe Anumaya Koti'a kefo yatimo anona'a otamisia agesa haviteno ma mopafi vea'mogami amaipa alino falu humateno agai'ene nagopi maiho.” huno hulatene.

²⁰ Hulategeta Anumaya Koti'a Kalaisi agile huhaleno tahapaigeta agai'avayafiti kea mage nehune “Musetami nehunagi Kalaisi'a tamakaifene huno fali-maineafe Anumaya Kotina tamako'ya hute yana ataletama agai'ene tamaipa alitama falu hutama nagopi maiho.” huta tamahapai-mainone.

²¹ Nagi tagaila taya hisiafene huno hulate-neafe nagola osi kefo yama'a omalenea kanoa, Yisasi'e, tagayama kefo yama hu-mainona yana alino Yisasi agupile maleno kefo yatimo anona'a amigeno kefo yama nehaya vaya kana huno fali-maineafe Anumaya Koti'a tagaifena “Nagai'ni'a fatago vea'ni'a mainae.” huno hulatene.

6

Aposolo vaya'mo'ya ali'ya'amiletila kasago'ya kana ya ali-mainae.

¹ Anumayamo'ene ailokaeta ali'yana ne'alita mage huta ali lamakafa nehune. Anumaya Koti'a kayone yama'a ago tamamigetama ali-mainagi

afa kavala ohutama akave maleme maleme haiho.

² Anumayamo'a agai'a avopina mage huno hu-maineneane

“Nagu'amo'a kanale nehige'na nahavigaya kea havuanagi tamaugafama aligatisua kanale tamaya hugahue.” huno hu-maineneane.

Hu-mainenanagi'na tamahanepauve meni kanafina Anumaya Koti'a agu'amo'a kanale nehigeno tamaku tamamena aligatisiafe nehaigi tamaku'a aiyahae hiho.

³ Ali'yatihena “Haviya hie.” hu'ya ohisaya yafe tagaya kefo yana nohune. Havigu kefo yama hisunana vea'mo'ya nelage'ya amaku'a aiyahae ohugahae huta lagaya tagu tametela kava ne'yagaune.

⁴ Anumaya Koti ali'ya vaya mainone huta muki'a ma'a kavala nehune. Vayamo'ya ali'ya haviyama hulatayana tokiya vaita mailava huta mainone. Kana yama falote higeta mailava huta mainonafe tamakaya “Kanale ali'ya vaya'a mainae.” hutama hisaya yafe tagutela kava ne'yagaune.

⁵ Ne'yagaunageno ma'a yana falote humaine ka'yoteti nelahae'ya nofi hulatenae. Muki'a vea'mo'ya alakenake hu'ya tahaegahe humainae. Tusi'a ali'ya ne'alita taula ofaonageno tusi'a tagate-mainene.

⁶ Na'a hulatayanagi oni'ya'age kavala ohune. Anumayamo kea havilama hulineta mailava huta maineta veala ali kayone humateta amaya nehune. Alu Aotage Avamula tagu'afi maineno laya

higeta lamage huta veafena tahau tayamopafi nelahaiye.

7 Nelahaigeta kelamage kea huta Anumaya Koti tokiyaleti ali'yana ne'alita vaya'mo'ya ati kevema tamaga amayapina ne'ali'ya hauga amayapina halegula aye haite'ya kamema nehaya avamete huta fatago kavake'ya nehuta Satani'enena tua nehuta Anumayamo ali'yana ne'alune

8 Nago'a vea'mo'ya tagia alisaga nehayanagi nago'a vea'mo'ya tagia ali haviya hunelatae. Nago'a vea'mo'ya kamugea hatage'ya vainelayanagi nago'a vea'mo'ya hu'ya kanale hunelatae. Tagaya tama kavake'ya nehunanagi tagaifena “Havige hu'ya ayelavataga nehae.” hu'ya nehae.

9 Nago'a vea'mo'ya tagaifena “Afa vaya kana humainae.” hu'ya nehayanagi Anumaya Koti'ene nago'a vea'nene “A'ao amaki hanea vaya mainae.” hu'ya nehage'ya nago'a vea'mo'ya tatafa hu'ya tahayayanagi ageho ofalinone. Anumaya Koti kema nehunafenagi'ya hamai vailate'ya tahayayanagi ofalinone.

10 Nago'a yafena tahauna hunanagi muki'a kanafina taipamo'a kanale nehigeta musena nehune. Afeno yatia omaleanagi Yisasi kema huhaleta nehunafenagita nago'a vea'mogamina tusi'a kanale yana ne'amamune. Nago'a yatia omaleanagi afeno ya'amima hanea vaya kana huta mainone. Ani yamo'a tagaipina falote hige'ya vea'mo'ya tagaila nelagae.

11 Kolini kumate mainaya nelafugatama tamakaifena aluya huno nelahaigeta nago kea fala okinonagi fatago huta tamahapai-mainone.

12 Tamahanepaunageno tamakaifena lahaiyanagi tamakaya tagaifena otamahaiye.

13 Nagai'ni nafa'ne kana hutama mainayafe tamakaila tagu'ama tamamuna avamete hutama anonatia tagaila tamaku'a tamiho.

Tagaya Anumaya Kotina alu aotage noma'a mainone.

14 Ali'ya aligaheno a'nemo'ya vema aligaheno vemo'ya a'nema aligaheno na'lama hinutamahena Anumaya Kotina amakave'no hune'ataya vea'nenena ailo okaeho. Ailokaetama maisayana hana'a huno fatago humainea ya'ene kefo yamo'lenena ailokae'ana maiga'e? Hani yamo'a hale yamo'lenena ailokaega'o?

15 Ifi Yisasi Kalaisi'ene Satani'lenena ailokae'ana nagoke anaipale maiga'o? Ifi Anumayamo akave nomalaya vea'nene Yisasife havi'ya amakupi malenaya vea'nene ailokae'ya maisayana nagoke amaku amakesale omaigahae.

16 Ago fali-mainaya veafe "Anumayati maine." hu'ya amakisana ne'vaiya ya'ene Anumaya Koti'ma maine no'ene ali'ya nagopi malesayana kanale hugahio? Anumaya Koti'a haimu'ene kanoa tagai tagupi maineafe Anumaya Koti avopina mage huno hu-maineanne

“Nagaya amakupi maine¹na amakai¹ene vaiyatete nehu¹na Anumaya Koti¹ami maisuge¹ya nagai anaga maigahae.

¹⁷ Ani yafe kefo yana ne¹ataletama alule mainetama oni¹ya¹age kefo yana ohisage¹na nagai¹nilega tamavale¹na tamategahue.

¹⁸ Lamatene¹na tamakaila nelamafa¹na maisug-etama nagai nafa¹ne muna¹neyaga maigahae. Nagaya muki¹a tokiyamona aepa¹agi¹na mainoe. Anumayamo¹na, mani kea nehue.” huno hige¹ya kae-malenayane.

7

¹ Ani kema hulokiya vaino hulateneafe nahau nayamopafi nenahaiya nenafu-gatama taugafaene tagu tame¹ene ali haviya hisia kavala ne¹ataleteta Anumaya Kotifema koli hisuna tagesa havita fatago kavake¹ya huge huge nehuta alu aotage vea¹ne maisune.

Kolini vea¹mo¹ya amaku¹a aiyahae haya yafe Polo¹a muse humaine.

² Tagaifena tamaipa haviya ohutama tamaku¹a lamiho. Nago¹a veala ali haviya hu no¹amatone. Nago¹a veala havi katela amavaleta no¹amatone. Nago¹a veala ayemavataga huta mone¹amia no¹alune.

³ No¹alunagi kelamama-kisuafene hu¹na mani kea nohugi “Nahau nayamopafi nenahaiye.” hu¹na ago tamahapai-mainoe. Afa¹a maisunano falisunano tamakai¹ene ailokaeta maigahune.

4 Tamakaya fatago hutama maigahae hu'na nametitia nehu'na tamakia alisaga nehue. Muki'a kana yana nagaipima falote hige'na ani yapima mauvanagi tamakaifena naipa havi'na tusi'a muse nehue.

5 Masetonia kotega uva'yi hunanagi alu kumate kumatela kana yamo'a falote hige'ya nago'a vea'mo'ya tagai'ene ke vai'ya tu hulatageno tagu'amo'a koli hia kava higeta maifalua ohunone.

6 Ohunonagi Anumaya Koti'a kana yama aliya veala amaku'a alino kanale hune'amatea kano maineanagino Taitasina hutegenoa ea'amo tagu'a melino falu hulatenene.

7 Taitasi'ma ea yafekela musena nohunagi Taitasina hutageno mage huno me lahapaiye “Amakaya Kolini kumate mainaya vea'mo'ya kanale yama hunataya yafena nagu'a alino kanale humaine.” huno huteno “Kagesaya yafena hamaige'ya kagayama hamapai-mainana kefo ya'amihena amaku'a aiyahae hayanagi ne'atale'ya 'Nago'a vaya'mo'ya kagai kagia ali haviya hugahe hayanagita tagaya kaya hugahune.' hu'ya hae.” huno hia yafena naipamo'a kanale hige'na tusi'a muse nehue.

8 Nehugi avoma kae'na lamamuana tamaipamo'a haviya hie hu'na nagesa havuanagi “Haviya hu'na avona kae'na amaminoe.” hu'na hu-mainoanagi menia osi kanafina tamaipamo'a kana higetama etetama tamaku'a aiyahae haya yafena muse nehu'na “Kanale'ya hu'na avona kae'na amaminoe.” hu'na nagesa havimainoe.

9 Havite¹na menia muse nehue. Tamaipa kanama haya yafena musena nohugi tamaipa kana hutetama etetama tamaipama aiyahae haya yafena muse nehue. Anumaya Koti¹a ani¹a huno tamaipa kana hutetama etetama lamaipama aiyahae hutama agaitegama aya yafena muse nehigi tamaminoa avomo¹a tamakaila alino haviyana ohunegi kanale¹ya hulamatene hu¹na nehue.

10 Tagu¹a aiyahae hisunafe Anumaya Koti¹a kana yana tagu¹afina nelamie. Tamisigeta aliteta tagu¹a aiyahae hisunageno tagu tamena aligatisiafene huno nelamie. Ani yafe Anumaya Koti¹ma tamia kana yafena “Otahaiye.” huta nohunagi ma mopafi yafema amakesa havi havi nehaya vea¹mo¹ya kana yama falote hinage¹ya amaku¹ama aiyahae ohisageno¹a Anumaya Koti¹a amaya ohinage¹ya falite¹ya hani yapi ugahae.

11 Tamakaipima mainea kanomo¹a kefo yama hige¹na osi avona kae¹na tamamugetama agetageno tamaipamo¹a kana higeno Anumaya Koti¹ma tamaminea kana yana tusi¹a kanale¹ya hulamatene haviho. Ani kefo yafena “Tagaye nehinagetama aupa¹a alitalegahune.” hutama tamaku¹a aiyahae humainagi koli hutama ani kefo yama humainea kanomofena tamaipamo¹a kana higetama anona¹a aminayafe nagai¹ma nagesaya yafena nelamahaiye. Anima muki¹a yama humainaya yafena tamakaya ani kefo yama ohunaya yana ago naveli-mainae.

12 Mani avoma kaovana ani kefo yama

nehia kanomofe¹ene kefo yama hutaya vea¹nenefe hu¹na okaenogi tamakaife hu¹na kae-malogetama tamakaya hapalitama Anumaya Koti aufina ani avopiti kea akave maletama “Polofe lahaigeta agai vea¹ne mainone.” hutama hisayafene hu¹na mani avona kae¹na tamaminoe.

¹³ Tamaminogi nagai kema haviya yafena naipamo¹a kanale¹ya nehie.

Na¹afenomagi ani¹a hutama Taitasi aipama alitama kanale haya yafena nago¹ene naipamo¹a kanale¹ya nehie.

¹⁴ Tamakaifena muse hu¹na tamakima alisaga hu¹na Taitasina hapaugetama kanale kava¹ma hutaya yafena nagayea nohie. Tamakaila kelamagemama tamahapai-mainoa avamete hu¹na Taitasina tamakaifema hapauva kea havigea hu¹na ha¹opainogi tamakaya hapauva avamete hutama kanale¹ya humainae.

¹⁵ Tamakaya koli hutama atali hutetama agai kema haviya yafena Taitasi¹a agesa havi havi huno tamakaifena aipamo¹a aluya huno musena humaine.

¹⁶ Ani yafe tamakaya kefo yana ohiho. Fatago hutama maigahae hu¹na nametitua nehu¹na tusi¹a muse nehue.

8

Anumayamona amaku¹a aminaya vea¹mo¹ya Yutua vea¹ne amaya hisaya mone alitalu humainae.

¹ Anumaya Koti¹a Masetonia maine¹ya Yisasina amaku¹a aminaya vea¹mogamina kayone yama¹a amamige¹ya kanale yama haya yafe tamaha-paigahe hue.

² Ani veapina tusi¹a kana yamo falote hianagi Anumayamofena muse nehu¹ya amakaipina osi kano¹a afeno ya¹amia hanege¹ya afa vea¹ne maiyanagi tusiya hu¹ya alu vea¹mogamima amaya hisaya yafena monea alitalu hu¹ya kanale kavake¹ya humatenaē.

³⁻⁴ Tamahanepauve osi kano¹a afeno ya¹amia hanege¹ya “Nago¹a tagaitia malesune.” hu¹ya amakesa ohavi¹ya havigu mainaya vea¹mogamina monea amaminaē. “Ani kava hiho.” huta hama¹opaunanagi “Tatalageta Yutia maine¹ya Yisasina amaku¹a aminaya vea¹mogamina amaya hamano.” hu¹ya hute¹ya ani kavala humainaē.

⁵ Hyanagita “Monea osi¹a amamigahae.” huta hunanagi ala mone hage¹ya amaminaē. Ani yama¹agelomagi Anumaya Kotifena hamaiya avamete hu¹ya hagote¹ya amakai¹ami amaku¹a Anumayamona amitafa hute¹ya ani¹a hu¹ya amaku¹a tagaila taminaē.

⁶ Na¹a hayafe Taitasifena mage huta hapai-mainone “Hagoteka Kolini vea¹nene umaineka ‘Nago¹a vea¹mogami amaya hisia monea alitalu hiho.’ huka hamapai-mainanagi menia anima kayone hisaya ali¹yana molivayayo.” huta hapai-mainone.

⁷ Tamakaya muki¹a yama haya yamo¹a aluya

huno kanale ya higetama Anumayamofena havitama lamakupi maletama lamametitima haya yamo tokiya'agela hutama Yisasi kema hayana fatago kege'ya nehae. Kanale tamaku tamakesaene vea'ne mainayafe tagaifena tamahau tamayamopafi nelama-hainagetama menia kayone hutama vea'mogamina amaya hisaya monema ne'amamiya ali'yana aluya hutama aliho.

⁸ “Monea amamiho.” hu'na kahegi kea no-hugi nago'a vea'mo'ya kanale'ya hu'ya monea malage'na agete'na fako hulamatogi hana'a hugahae? Nago'a veafe tamahau tamayamopafi nelahamaiya yana kanale'ya huno haneo? hu'na nelamakoe.

⁹ Tamakaya Anumayati Yisasi Kalaisi'a kayonema hulatenea yafena ago havilinae. Tusi'a kanale yapi maineanagino tagaifene huno tagayama kanale noma maisunafene huno agai'a kanale mai'yama'a ataleteno ma mopafi ea'amo tusi'a havi noma mainea yateti tamakaya muki'a kanale yana ali-mainae.

¹⁰ Ali-mainagi ani kanale kavala hiho hu'na nagesa havua kea tamahapaigahugi haviho. Tamakaya ago ha'no humainea kafufina hagotetama “Ani monea alitalu hisune.” hutetama aepa hetama alitalu hu-mainagi menia ani ali'yake'ya alitama alivayayeho.

¹¹ “Monea amamigahune.” hutama hayanagi menia ani'a hutama amamisaya tamakesama havinutamahena malenesaya yapitila ali ha'no hutama alitalu hutetama amamiho.

12 Nagi amaku'amo'a kanale hige'ya malenaya monefiti amaminaya yafena Anumayamo'a muse humateanagi nago'a vea'moya nago ya'amima omalesayana Anumayamo'a “Amamiho” huno ohugahie.

13-14 “Amakaya kanale no maisaya yafe ala monea amamitetama monetamia omaleafe tamakaya havi no maigahae.” hu'na nohugi menia monea tamakaipi haneafenagi'ya omalege'yama afa'a mainaya vea'mogamina amaya nehutama haenaga'a tamakaya omalesigetama afa'a maisage'yahena tamaya hugahae. Ani kava'ma hisayana muki'amogatama nago avamete hutama maigahae.

15 Nayona Anumaya Koti'a Isaleli vea'mogamina ikapinagati kave amaminea kanafina Anumaya Koti avopina mage huno hu-maineanne
 “Kasago'ya ali-mainnea kanomo'ene osi'a ali-mainnea kanomo'enena amamu hia kave nemainae.” huno avona kae-maleneane.
 Na'a humaineafe amaya hiho hu'na nehue.

Polo'a nago'a vayala humatege'ya Kolini kumate umainae.

16 Tamaya hisua nagesa havua nagesa Anumaya Koti'a Taitasina ago aminea yafena Anumayamofena muse nehue.

17 Muse nehugi “Koloni kumate vuo.” huta hutonana “E, muse nehue ani kumate visua nagesa nehavue.” huno agai'a humaine.

18 Humainegi nago kanoa kanale'ya huno Yisasi kanale mono kea huhaleno hige'ya muki'a vea'mo'ya muse humainaya kanoa hutesuge'ana Taitasi'ene uga'e.

19 Ani yama'agelomagi alu kumate kumate Yisasina amaku'a aminaya veapina tagai'ene vaiyeno taminaya monea alita momisunafe ani kanomona ali'ya hetitenae. Hetitageta veafeke tahau higeta Anumayamo agima alisaga hisuna yafe “Monea alita momamisune.” huta nehune.

20 Ani tusi'a monema alitalu haya monehena havigu vea'mo'ya tagaifena “Havi kava hae.” hu'ya hisaya yafenagita lagaya kava yagaita ani tafutagana'ene nagopi vaiyegahune.

21 Kava yagaita Anumayamo aule'ene vea'mogami amaule'ene kanale'ya huta ali'yana alisuna yafe nelahaiye.

22 Nelahageta nago tafu-tagana'a muki'a kanafina alu ali'ya alu ali'yana ne'alianagita fako huta agonana tokiya'age huno vea'mogamina amaya nehianagino menia aluya huno lamakaifena “Kanale kava hugahae.” huno hia yafe Taitasiganiene hunategahune.

23 Tamakai'ma tamaya hisia yafe Taitasi'a nagai'ene tokaeno maineno ali'yana ne'alige'ya alu kumate kumate mono note vea'mo'ya humatage'ana agai'ene va'a tafu-taganaganiania ali'yama ne'ali'a yamo'a Kalaisi agia alisaga neha'e.

24 Na'a neha'afe tamakaya tamahau tamayamopafima nelahamaiya yafena tamakia

alisaga huta hamapai-mainona yana amavelisaya yafe anima esaya vayala amaya nehisage¹ya Yisasina amaku¹a aminaya vea¹mo¹yama agesayana “Polo¹a humainea kea tamage humane.” hu¹ya hugahae.

9

Kolini vea¹mo¹ya muse yana Anumaya Koti vea¹nea amamisaya yafe humane.

¹⁻² “Yutia maine¹ya Yisasina amaku¹a aminaya vea¹ne amaya huta monea amamigahune.” hutama haya kea havite¹na Masetonia kotega mainaya vea¹mogamina tamakaifena mage hu¹na hamapauve “Akaiya kotega mainaya vea¹mo¹ya ago ha¹no hia kafufina anima amamisaya monea ago talo tala humalenae.” hu¹na hamapauge¹ya nago¹a vea¹mo¹ya tamakaya tokiya¹age¹ma hutama haya yafena havite¹ya “Tagaya ani¹a hugahune.” hu¹ya nehae. Ani monema amamisayafene hu¹na nago¹ene avoma kaesuana afa ya kana hugahie.

³ Tamakaifena “Ago talo tala humalenae.” hu¹na hamanepaugi havigu “Kagaya havige nehane.” hu¹ya huyafenagi ani monea menima alitalu hisaya yafe nago¹a tafu-taganagama hu-matesuge¹ya tamakaitega ugahae.

⁴ Ani monema alisuafe nagaya amakave visua¹amo¹na Masetonia kotega mainaya vea¹nenema visuge¹ya havigu monema alitalu ohunesage¹na nagayaene tamakayaenena

tagaye huyafene hu'na nago'a vayala hagote'na humatesuge'ya ugahae.

⁵ Ani monehena “Kasago'ya amamigahune.” hutama humainaya monea talo tala hisayafene hu'na nago'a tafu-taganagamina humatoge'ya ugahe nehagi uva'yima hute'ya “Na'ama tamihō.” hu'ya hisagetama amamiho. O'amamisaya tamakesa ohavitama tamaipa kanale yapiti ala monea afa'a amamiho hu'na nehue.

⁶ Ani monema amamisaya yafena tamakesa haviho. Osi avina kano'a fai-malenesia kanomo'a kosa ohesia kave kano'a aligahigi kasago'ya hoyā vai-malenesia kanomo'a kasago'ya kave'a aligahie.

⁷ Na'a hu-mainaeafe tamakaya tamahaote tama-haote tamaku tamakesa havitetama “Ma monea amamigahune.” higeno tamaipamo'a kana'agela ohinagetama kanale'ya hutama amamiho. Aipa kanale yapiti vāyā kaikai hisia kanomofena Anumaya Koti'a hau ayamopafi nehaiye.

⁸ Anumaya Koti'a kosa helamatesia yana kay-one yama'a tamamisia amuko'a haneanagino muki'a kanafina tamakaila tamaya hisia ya'ene muki'a vea'mogamina amaya hisia yama'aene kosa helamatesia yana alu ya alu yana tamami-gahie.

⁹ Na'ama hisia yafena Anumaya Koti avopina mage huno kae-maleneane

“Nago'a vea'mo'ya afeno ya'amima omalenesia vea'mogamina amamite amamite his-ageno fatago kava'amimo'a hanege ha-

nege huno agola hanegahie.” huno kae-maleneane.

¹⁰ Anumaya Koti¹a avina yana tamigeno anifiti nena hutegeno kavela falote higeno nelamino vaya¹ma kaitama amaya hisaya yana kasago¹ya tamamisigetama tamahau hutama vaya¹ma kaisayana fatago kavatamimo¹a ala hugahie.

¹¹ Anumayamo¹a muki¹a yana tamamisigetama muki¹a kanafina veala amamigahae. Amamisayafene hutama tagai tayapi malenesageta ani vea¹mogamina amamisuna yateti Anumaya Kotina musena hutegahae.

¹² Yisasina amaku¹a aminaya vea¹mogamina kosa heo¹amatea yama amamiyanagi ani yama¹agelomagi ani kava¹ma haya yafena tusiya hu¹ya Anumaya Kotina musena hutegahae.

¹³ “Kalaisi kanale mono kea havita lagupi malenone.” hutetama ani kea kanale¹ya hutama akave maletama vaya kaikai nehutama amakai¹ene nago¹a vea¹nene amaya hutama amave-lisage¹ya “Tamage Anumayamo akave nehae.” hu¹ya Anumaya Koti agia alisaga hugahae.

¹⁴ Alisaga hisageno Anumaya Koti¹a tusiya huno kayone hulamatesia yafe amakesa havi¹ya tamakaifena aluya huno nehamainage¹ya “Anumayamo¹a nago¹ene tamaya hisie.” hu¹ya nunamuna hugahae.

¹⁵ Anumaya Koti¹a tusiya huno kayone hulateno laminea kanohena hana¹a huta musena hisune. Ani yafe Anumaya Kotifena tusiya huta musena hutesune hu¹na nehue.

10

Polo ali'ya ali haviya haya vaya'mogami kenona'ami humane.

¹ Nago'a vaya'mo'ya nagaifena mage hu'ya nehæe “Polo'a alule'ma maineno'a tagaifena tokiya'age ke nehianagi tagai taule'ma emaiyana koli huno kea nohie.” hu'ya nehayanagi nagaya Polo'na musetami nehugi Kalaisi'a ako huno kay-one humanea avamete hu'na ako hu'na kayone kefiti mage hu'na tamahavi-negoe.

² Tamakaya mainesale'ma uva'yi hisuana tokiya'age ke huyafenagi menima omenesule ali fatago hiho. Ali fatago ohisayana nago'a vea'mo'ya nagaifena “Mopafi vea'mo'ya nehaya avamete kava nehie.” hu'ya haya vea'mogamina nagayama vinu'nahena ani veafena tokiya'age ke hugahue hu'na nehue.

³ Tamage tagaya mopafi vaya mainonanagi Satani'ene tuma hunana atafa laipa akave maleta tua nohune.

⁴ Mopafi mainaya vea'mo'ya kame hugahe nehaya avamete huta ati kevea alita kamea nohunagi Anumaya Koti'a agai'a tokiya ago tamineanagita Satani tokiya yama'a ali haviya huta ne'agasone.

⁵ Satanina agaseta Anumaya Kotifena havigema hune'ataya kemona ali haviya huteta vea'mo'ya amakai'ami amaugafama ali'ya haite'ya “Anumaya Koti kema ohavigahune.” hu'ya nehaya kemona agaseta hu-mainona keleti

amakai'ami amaku amakesa Kalaisi aiyafinaga
agai kema akave hisayafe amatenone.

6 Amatenonafe tamakaya tamaku'a
aiyahae hutama muki'a Kalaisi kea akave
malesageta kema ne'atagaya veala anona'amia
anamigahune.

7 Tamakaya amega yate ne'agae. Nago'a
vea'mo'ya “Tagaya tamage huta Kalaisi vea'ne
mainone.” hu'ya hisayana nagai'enena ani'a
hu'na Kalaisina agai kano mainoa yafena
lamakesa havi havi hutama maiho.

8 Tagaya kavatami mainonafe tamaku'a ali
lokiya vailama-tesunafene huno Anumayamo'a
tagaila hulatene. Tamaku'a ali haviya
hisunafene huno huotatenegi Anumayamo'ma
hulatenea yafe tusi'a muse hu'na veala
hamanepauva yafena nagayea ohugahie.

9 Nagayama kae-maloa avona koli'ni'a hisaya
kea hu'na avopina okaenoe.

10 Nago'a vea'mo'ya nagai'fena mage nehae
“Polo'a avoma kaeno lahapaiyana tokiya'age
hunone keanelama-kianagi tagai taule'ma ne'eno'a
fulu fulu kano emaineno koliti huno afa ke maino
nehie.” hu'ya nehae.

11 Na'a kema nehaya veala mani kea haviho.
Avopiti'ma hua kene navayafiti'ma hua kenena
nagoke augafa avamete ke haneanagi'na ani
kavala hugahue.

12 Hugahuanagi ani vea'mo'ya
nago'amogamina maiya au'ava'ami agete'ya
“Na'a nehaya vea'ne mainagi nagai au'ava

yamo'a amakaila amakase'na mainoe.” hu'ya nehayanagi kanale amaku amakesa omalene. Omaleneanagi'na nagaya “Amakaya maiya au'ava yamona ago amakase'na kanale'ya hu'na mainoe.” hu'na hisuo? “Ifi nagaila ago nagase'ya kanale'ya hu'na mainae.” hu'na hisue? Na'a avamete kavala ohugahue.

¹³ Anumaya Koti'a alisuna ali'yana ago tamiteno ani ali'yate tavalegeta tamakaitegama onana anima taminea ali'yake'ya ne'alita tagia alisaga hugahunanagi nago'a ali'yafena tagia alisaga ohugahune.

¹⁴ Ohugahunagi nago'a vea'nea omenageta tagaya hagoteta Kalaisifena kanale mono kea tamakaila tamahapai-mainonafe menia ani ali'yafena muse nehugi Anumaya Koti'a otaminesia ali'yafena tagia alisaga ohugahune.

¹⁵ Alu vaya'mo'yama ago'ma ali-mainesaya ali'yafena “Tagaiti ali-mainona ali'yane.” huta tagia alisaga nohunagi Yisasife havitama tamakupi malenaya yamo'a ala huno tokiya'age hisigetama tamakaipina nago'ene Yisasi mono kea tamahapaisunageno ali'yatimo'a ala hisie huta tametitia nehune.

¹⁶ Na'a hisigeta kotamia agasetu alu kote kote vaiyeta Anumayamo kema ohavinesaya vea'mogamina mo hamapaisuna yafe nelahaiye. Alu vaya'mogami ali'yatela tagia alisaga hisuna yafena notahaiye.

¹⁷ Anumaya Koti avopina mage hu'ya hu-mainayane

“Nago kanomo¹a agima alisaga hugahena Anumayamo agige¹ya alisaga hino.” hu¹ya kaemalenayane.

18 Nago kanomo¹a “Kanale kavake¹ya nehua kano mainoe.” huno hisia kanomona Anumayamo aulela agia omalenegi Anumayamo¹a agai¹a nago kanomofena “Kanale kavake¹ya nehia kanoe.” huno¹ma hisigeno¹a tamagelafa huno Anumayamo aulela agimo¹a hanegahie.

11

Polo au¹ava yamo¹a havigema nehaya Aposolo vaya kana ohune.

¹ Ako hutama natalenetama mani kea haviho. Afa¹a osi¹a aifo ke kana ke hugahugi ako hutama maiya avamete nago¹ene maiho.

² Anumayamo¹a tamakaifema agesa nehavia avamete hu¹na havi kapi o¹visaya yafe nagesa ku¹mo¹a tusiya huno nehie. Nagi nagola hagemalenea munala alu vemo¹a avayu hia yafe a¹mona nefa¹a tusi¹a agaye nehia avamete hu¹na nagaya Kalaisina alu aotage vea¹ne¹a maisae hu¹na kava yagainelamatoe.

³ Osifa¹vemo¹a savale¹ma huno Ivina ayevataga humainea avamete hu¹ya nago¹a vaya¹mo¹ya ayelama-vatagama hisagetamahena tamakesa ali fatago hutama Kalaisi akave¹ma ne¹valetila agai katela ne¹ataletama tole lamakesa havitama Kalaisina tamakave¹noma hutesaya yafena nagaila tusiya huno nagesa ku¹mo¹a nehie.

4 Yisasifena ago tamahapai-mainoa kea nago¹a vaya¹mo¹ya nohagi Yisasifena havigea alu kema me lamahanepaiyana tamakaya “Tamage nehae.” hutama aupa¹a amakave nemalae. Nemalayanagi tagaya “Alu Aotage Avamula tamakupi emaigahie.” huta nehunanagi amakaya haya kemo¹a mage hae “Alu kanomo avamula tamakupi emaine.” hu¹ya hagetama aupa¹a muse nehutama tusi¹a havi kava nehae.

5 Anima havige hu¹ya ayemavataga haya vaya¹moya tamage hu¹ya nagaila onagasenae.

6 Aupa aupa kema hisua tokiya¹nia omalegi aluya hu¹na nagu nagesaene kano maine¹na muki¹a kanafina kanale kava hu¹na muki¹a yana muki¹a vea¹mogami amaufina kea huhale¹na nehugetama nehaviye.

7 Anumaya Koti kanale mono kema tamahapauvana “Nago¹a monea namiho.” hu¹na ohu-noe. Tamavalesaga hisugetama tamakaya anale maisaya yafe nagai¹nia ako hu¹na mai kayone hu¹na nayapiti ali¹yana ali-mainoe. Ani¹ama huana kefo ya humaino?

8 Tamakai tamaya hu¹na mono ali¹yana ne¹aluge¹ya alu kumate maine¹ya Yisasina amaku¹a aminaya vea¹mo¹ya nagaila naya hu¹ya monea naminae. Namige¹na ani monea ali¹na musufayama nehia kanomo nehia au¹ava kavala humaino?

9 Tamakaipina ali¹yama aluana nago¹a yani¹ama omalege¹na “Monea namiho.” hu¹na tamahaviokenogi Masetoniati aya vaya¹mo¹ya

muki'a yana naminae. Hagote'nama havimainoa nagesa haenaga'a ani'a hu'na tamakaifena “Monea namiho.” hu'na ohugahue.

¹⁰ Kalaisi kelamage kemo'a nagupima haneafene hu'na tamagea nehue. Monema o'ali'na afa ali'yama ne'alua yafena tusi'a muse nehuafe nagola Akaiya kotega mainaya vea'mo'ya ani musema nehua yamo'a kani'a tileonategahae.

¹¹ Na'a hige'na ani kavala nehue? Miya o'alua yafe tamakaifena nonahaiyo? A'ao tamakaifena nahau nayamopafima nenahaiya yana Anumaya Koti'a ago age-maine.

¹² Havigema tamahanepaiya vaya'mo'ya amakima ali'ya haigahena “Polo'ma nehia kava nehune.” hu'ya hu-mainesaya kea ohavisaya yafe nagaya humainoa kavala huge huge hu'na tamakaipitila monea o'aligahue.

¹³ Ani vaya'mo'ya havigege'ya nehage'ya vea'mo'ya “Kalaisi Aposolo vaya mainae.” hu'ya hulatesayafene hu'ya Aposolo vaya kana nehuya veala ayemavataga nehae.

¹⁴ Na'ama hayana amakai'ami-omagi Satani'a agai'a hale yapima nemaiya ensole vaya kana huno ali hapaeteno vea'mogamina ayemavataga nehie.

¹⁵ Satani ani kavala nehige'ya agai'a ali'ya vaya'mo'ya ani'a hu'ya fatago yamo ali'ya vaya kana hu'ya ali'ya hapaesayana tamakaya atalia ohiho. Haenaga'a ani kava'ma nehaya yamona kefo miyana anona'amia aligahae.

Polo'a Aposolo ali'yatetila kasago'ya kana ya ali-maine.

¹⁶ Nago'ene tamahanepauve nagima ali'na hauva yafena nago'a vea'mogatama nagaifena “Agaya aifo kano maine.” hutama ohiho. Ani kema hinutamahena natalege'na osi kano'a afa'a nagima ali'na haisua kea haviho.

¹⁷ Ani nagima ali'na haisua kea Anumayamo'a “Mage huka huo.” huno ohunea kea nagai'ni'a anegi ne'na aifo vaya kana hu'na mani kea nehue.

¹⁸ Muki'a ma mopafi vea'mo'ya havigu kema nehu'ya amakai'ami amakima alisaga nehaya kava hu'na nagai'ni nagia alisaga hu'na mani kea tamahapaigahue.

¹⁹ Tamakaila kelamama-ki'na mage hu'na nehue tamakaya kanale havi havi'yatamima hanea vea'mogatama na'a higetama aifo'nafo vaya'mogami kea nehaviye?

²⁰ Ani vaya'mo'ya “Tagai ali'ya vaya maiho.” hu'ya hagetama amakavela nemalae. Tamakaip- itila monea ne'ali'ya tamakaila ali'ya haviya hu nelamate'ya amakai'ami amaugafa ali'ya nehai'ya tamakaifena “Afa vaya mainae.” hu'ya haya kehena kea ohutama amatalage'ya ani kavala mai'ya nehae.

²¹ Ani kava'ma haya kavala nagaya na'a no-huafe havi kava nehuo? Nagaifena “Tokiya'a omale.” hutama nehao? Ani kema haya yafena nagayea nehugi nago'a vaya'mo'ya amakai'ami amaki alisaga hisaya kea nehayanagi nagayae-

nena ani'a augafa kea hu'na aifo vaya kana hu'na mani kea hugahue.

²² Ani vayala Hipalu* vaya'ma maisayana nagayaenena ani'a hu'na Hipalu kano mainoe. Amakaya Isaleli vea'mogami mono kema havisayana nagayaenena ani'a hu'na Isaleli vea'mogami mono kea nehavue. Amakaya Apalahamu aginagomo'ya mainesayana nagayaenena ani'a hu'na Apalahamu aginagomo'na mainoe.

²³ Amakaya Kalaisina ali'ya vaya'ama mainesayana nagaya amakaila amakase'na tusiya hu'na Kalaisi ali'yana ne'alue. Avo'nio nagima alisaga hua kea aifo ke kana ke nehue. Amakase'na nagaya tusiya hu'na Anumayamo ali'yana ne'alue. Amakase'na kasago'ya kanafina kina nopina mainoane. Kasago'ya kanafina ka'yo kevea naminayanagi amakaila osi'a amaminae. Nagaya kasago'ya kanafi falisua kavala huanagi amakaya nagayama hua kavala ani'a hu'ya ohunae.

²⁴ Yuta vaya'mo'ya faefu'a (5) kanafi alu ikate alu ikate teti naeni'a (39) haifula naminae.

²⁵ Tagufa (3) kanafi ka'yo kevea naminae. Nago kanafi yafa ka'yotetila nahae-mainae. Tagufa (3) kanafi tipi kalefina mainogeno timo'a ai kalato kalato huno nahaesia kavala humaine. Ani tipi kalemola kofa-nafa huno haviya hige'na nago yosa atupale atafa huli'na nago kanaene kege'ene felugaene tipina mainoane.

²⁶ Muki'a kanafina vaiyatete nehugeno nahae-

sia kavake'ya falote hunatene. Timo'a hogino nahaesia kava'ene musufaya nehaya vaya'mo'ya nahaesaya kava'ene nagai anaga'mo'ya, Yuta vaya'ene, Yuta vea omainaya vaya'ene nahaesaya kavake'yana hunatenae. Ala kumate mainoge'yaene ka'me kotega mainoge'yaenena ali haviyana hunatenae. Tipi kalefima umainoana nahae-mainae. “Negafugata mainone.” hu'ya havige nehaya vaya'mo'yaene nahaegahena humainae.

²⁷ Tusi'a ali'yama aluana nafia nelege'na kasago'ya kanafina naula ofae'na nagala neleno tife'lenena nage-mainae. Kasago'ya kanafina kavefe'ene kena'nienefena omalegeno yasimo'a nahaige'na havi no mainoe.

²⁸ Amega naugafamo kana ya'ene muki'a kanafina Yisasife havi'ya elitaluma nehaya vea'mogamina kava yagaisua yafena nagesa havi havi nehugeno nagesa ku'mo'a nehie.

²⁹ Ani veapina nago'a vea'mogamina hamao otage fatage hige'na amakaifena nahauna humatenoe. Nago'a vea'mo'ya vea'mogamifena “Kefo yana hiho” hu'ya hage'ya Anumayamo katela ne'atale'ya kefo yama hage'na naipamo'a ata lemaine.

³⁰ Nagia ali'na haisua nagesama havisugeno'a nago yafena fulu fulu kano mainoa yafe tamaveligahue.

³¹ Anumayatia, Yisasina Nefa'a, Anumaya Kotina, vaya'mo'ya agola agai agia alisaga huge huge hisaya kanomo aufina nagaya havigea

hu'na nohue.

³²⁻³³ Nagaya Tamasigasi kumate mainogeno sauve kanomo agia Aletasa'le kava kano'amona hutegenonatafa hisaya yafe “Katela yagaiho.” huno hige'ya yagai'ya maiyanagi vayanimo'ya kupinasaga hu'ya nate'ya anikuma'mona tokiya'age kegi'ya akalogapitino fi ali'ya ayete'ya alikale'yo nehage'na fale'na ayenefehu'na umainoe.

12

Anumaya Koti'a himona kana yapi Polona muki'a yana aveli-maine.

¹ Nagai'ni nagima alisaga hisuana naya ohugahigi alu katela omaleneanagi'na nago kene tamahapaigahue. Anumayamo'a himona kana yapi naveli-mainea kea tamahapaisue.

² Navelia yamo'a fotini'a (14) kafu nagasetege'na anikavafena tamahapaigahe hue. Anikanafina Kalaisi'ene ailokae'na mainoanagino Anumaya Koti'a ikapinaga navalege'na hauvana nagu name'ene haimainesuo naugafaene haimainesuo nagaya ohavinoe. Anumaya Koti'a agai'age havimaine.

³ Havimainegi ikapinaga navalege'nama hai-mainoa yafena havilinoe. Nagu nameke hai-mainesuo ifi naugafamo'ene hai-mainoe ohavinogi Anumaya Kotike haviline.

⁴ Ikapinaga hai-va'yi hute'na alu'a augafa avamete kea havite'na aniaugafa kea ma mopafi vea'mo'ya ohale'asinagi nagalu hu-malenea kea humaine.

5 Kanale muse yama¹a navelia yafena muse nehu¹na mani kea hugahuanagi nagai¹ni¹a nagia ali¹na ohaigahue. Tokiya¹nia omalegeno naya humaineafe muse nehu¹na tamahanepauve.

6 Tamage nagaya nagia ali¹na haisua kema hisua nagesama havule¹asina havigu-nagu kea ohugahuanagi¹na tamage hu¹na hule¹asinagi ani kea ohugahue. Veamo¹ya ani kea havite¹ya “Na¹a augafa kano maine.” hu¹ya hisaya yafena nonahaigi nemauva au¹ava¹niene nagai kema havisaya yafe¹ene musena hisae hu¹na nehue.

*Nekaya kana yamo¹a Polona augafafi aye-
maine.*

7 Anumayamo¹a tusi¹a kanale yake¹yama navelige¹na agoa yafena Anumayamo¹a mage hie “Havigu kaugafa alika haiyafene.” huno neka¹ya ako¹ya kana yamo¹a naugafafina malegeno nagata aiye. Ani kana yamo¹a Satanipiti falote higeno namineanagi¹na naugafa ali¹na ohaisuafene huno nagata yana namine.

8 Nagatama aiya yamo¹a fanane hisia yafe tag-
ufa (3) yupa Anumayamotega havige-mainoe.

9 Havigogeno kenona¹nia mage huno naha-
paiye “Ani yamo¹a ha¹no ohugahie. Nagaya kayone yani¹aleti kaya hisugenos kosa hegate-
sigeka ali¹yaka¹a afa¹a aligane. Kayamufa oma-
neafe tusi¹a tokiya¹nia falote hugategahie.” huno hige¹na ani kema havuafena nayamufa oma-
legeno Kalaisi¹a tokiya namige¹na musena hu-
mainoe.

10 Kalaisifena nagesa havi'na ali'yama'a ne'aluafe nayamufa omalege'ya nagai nagia hu-haviya nehao kana yama falote hunateo ifi Yisasi kema nehua yafe nagaila ali haviya hunenatao havi no maisuo ani yamo'ma falote hia yafena naipamo'a haviya ohugahianagina afa'a muse hugahue. Nayamufa omalegeno Anumayamo'a tokiya'ama naminea yafena tusi'a muse nehue.

Polo'a Kolini vea'mogami amametiti alino lokiya vaimatesia yafe humaine.

11 Tamakaya havi kava hutama nagai nag-ima alisaga ohayafene hu'na nagai'ni'a nagia alisaga nehu'na aifo vaya kana nehue. An-ima havigege'yama hu'ya mono kema tamahane-paiya vayafena tamakaya “Kanale vaya mainae.” hutama nehayanagi nagaya afa ya kana kano mainoanagi ani vaya'mo'ya tamage hu'ya na-gaila onagasenae.

12 Onagasenagi tamage nagaya Aposolo kano mainoafe tamakai'ene maine'na ako hu'na tokiya'age avame yana hugetama “Tamage Aposolo kano maine.” hutama nage-mainae.

13 Nage-mainetamagi tamakaya mage hutama nehae “Alu Anumayamo anaga'ma kava ne'yagaiya avamete huno tagaila kava nohie.” hutama nehao? A'ao, nagoke avamete hu'na kava yagainelamatoe. Tamakaipina nagoke yana alu kavala humainoe “Monea namiho.” hu'na o'alinoa yafena “Havi kava hie.” hutama nehao? Ifi hanageke yama hu-mainesuana afa'a aigenatetama atalenateho.

14 Nagi tole kanale mo lamake-mainogi menia tagufa (3) molia kanale nago'ene mo lamakesuafene hu'na nehuanagi tamakaipitila nago'a yana o'aligahue. Tamakai monehena nonahaiye afa'a tamakayama Yisasina tamaku'a amisaya yafe nenahaiye. Nafa'nemo'ya ita-af'o'amimogamife hu'ya monea alitalu hute'ya kave amamisaya ali'yana omalenegi ita-af'o'amimo'yage nafa'ne'amihena hu'ya monea hala'ya hute'ya kavela ne'amamiya yane. Nagaya ani'a hu'na nelamafa'na mainoanagi'na “Nafa'ne'nimogatama monea namiho.” hu'na ohugahue.

15 Nagaya tamaya hisugetama Yisasina tamaku'a amisayafene hu'na muki'a mone'niene tokiya'niene atalegahue. Atalesua'amo'ma nafima lesiana kanalele. Tamakaifena tusiya huno nahau nayamopafina nenahaiyanagi tamakaya nagaifena tamahau tamayamopafina notamahaiyo? hu'na nehue.

16 Nago'a vea'mo'ya nagaifena mage nehae “Tamage Polo'a fufu yatela tagai monea no'aligi savaleke'ya huno havigege'ya nehuno falakino kesi monetia ne'alie.” hutama nehae.

17 Nehayanagi nagaya hana'a hu'na ayelamavataga nehue? Nago'a vayala humatoge'ya ayelamavataga hu'ya tamakai monea ali'ya me naminao? A'ao ani kavala ohunae.

18 Tamakaya mainalega Taitasi'ene nago tafu-tagana'ene “Vi'o.” hu'na hunatoge'ana umaina'e. Taitasi'a mo ayelama-vataga huno

tamakai monea ali-maineo? A'ao Taitasi'ene nagai'ene nago avamete huta'a kanale ta'agesale maineta'a ali'yana ne'alu'e.

¹⁹ Tamakaya manima kae-maloo kehena mage hutama nehao? “Tagai taufina agi alisaga nehie.” hutama nehao? A'ao Anumaya Koti au-fina Kalaisi'ene ailokae'na maine'na mani kea nehue. Nahau nayamopafi nenahaiya nenafugatama Yisasife hu'na tamaku'a ali lokiya vailamatesua yafe muki'a mani kea nehue.

²⁰ Na'afene koli nehu'na ma nagesa nehavue havigu tamakaya mainesalega uva'yi hisugetama onahaisia kava'ma hutama mainesayana naipa haviya hute'na kelamama-kisugetama nagaifena tamaipa haviya hinagetama havigu ke vaitama tamaipa ali haviya hisaya yamo'a tamahaivai yana falote hisigetama vava okai yama hisageno'a tamakaitami tamaugafaheke'ya tamakesa havitetama alu kanomo agia ali haviya nehutama veafema havige nehaya kava hutama ala tamaki alitetama kefo yama hisaya yafenagi'na koli nehu'na mani avona kae'na nelamamue.

²¹ Havigu tamakaya mainesalega uva'yi hisuge'ya oni'ya'age kefo kava'ene moli hulite'ya nehu'ya kumai he kava'ene age hama'ye hu'ya kumai nehaya kava'enema nayoma nehaya vea'mo'ya amaku'a aiyahae ohu'ya ani kavake'ya nehisage'na me ne'amakesugeno tamakai tamaufi Anumaya Koti'a nagaye hisifa yana namisigeno naipamo'a haviya hisia yafena tusiya hu'na koli nagesa

nehavue.

13

Kolini vea'mo'ya amametitile kava yagasae.

¹ Tole yupa tamakaya mainalega umainoanagi menia tagufa (3) molia kanale nago'ene vi-sue hu'na nehue. Nago kanomo'a kefo yama hisige'na kaiyekema hutesuana tole (2) vayalo tagufa (3) vea'mo'yao humainesia yama agete'ya hufalote hisayana kanalelagi'na kaiyekea hute-gahue.

² Ago'ma tamakai'enema maine'na humainoa kea menia alule maine'na mani kea nago'ene hu-lokiya vai'na lamahanepauve. Haenagama tag-ufa (3) molia kanale tamakaya mainesalegama esua kanafina kefo yama humainaya vea'nene nago'a vea'mo'ya kefo yama nehaya vea'nenena kaiyekea humatete'na anona'amia amamigahue.

³ Tamakaya nagafena “Kalaisi hapaiya ke nehio ifi agesafiti ke nehie?” hutama nehayanagi nagaya kefo yama nehaya vayafena tokiya'age ke hu'na me kemama-kisugetama nenagetama “Tamage Kalaisiteti tokiya'age kea nehie.” hutama hugahae. Tamage Kalaisi'a tamakaipima ali'yama ali-maineana fulu fulu kanoa omainegi tokiya'aleti ali'yama'a ali-maineane.

⁴ Tamage Kalaisi'a fulu fulu vea'ne mainaya avamete huno maige'ya yafaga yosalela nili he'ya asaigeno fali-maineanagi menia Anumaya Koti tokiyaleti hetino maine. Tagayaenena fulu fulu vea'ne mainonanagi Kalaisi'ene ailokaeta

mainonageno Anumaya Koti'a tokiya'a lamigeta agai'ene maineta agai tokiyaleti tamaya nehune.

⁵ Tamakaya tamakaitami lamaku'a agelama hutama lamakupi malenaya kea atafa hulitama mainao? Yisasi Kalaisi'a tamakupima mainea yafena havilinao? Tamakupima omainesiana agai'a veala tamagelafa hutama omainae.

⁶ Tamaku'a agelama hutetama ani'a hutama tagaila tagelama hutama lageho “Kanale kava nehae.” hutama hisaya yafe nenahaiye.

⁷ Nenahaiyafe “Kefo yana ohisae.” hu'na nunamuna nehue. Tamakaya kanale kava hisage'ya nago'a vea'mo'ya nelamake'ya “Polo'a kanale ali'ya ne'alie.” hu'ya hisayafene hu'na nunamuna nohugi tamakaitamia kanale kava hutama maisae hu'na nunamuna nehue. Nago'a vaya'mo'ya tagaifena “Anumayamo kea nehu'ya havi ali'ya ne'aliye.” hu'ya hisayana kanalele.

⁸ Anumaya Koti kelamage kemo'a “Ohiho.” huno humainesia kea ohugahunagi agai kea akave malesuna vaya mainone.

⁹ Tayamufa omalenagetama tamakaya mai lokiya vaitama mainesaya yafena muse nehune. Fatago hutama tokiya'age hisae huta nunamuna nehune.

¹⁰ Tamakaya mainalega uva'yima hisuana havigu Anumaya Koti'ma naminea tokiyaleti kelamama-kiyafene hu'na menia alule maine'na mani avona kae'na nelamamugi tamaku'a aiyahae hiho. Anumaya Koti'ma naminea tokiya tamakaila alino haviya hulamatesia yafe onaminegi tamakaila tamaku'a ali'na tokiya vaila-

matesuafe namine.

Polo'a huno falu fala humatenea ke.

¹¹ Nafu'nagana-gatama nagaya hua kemo'a ha'no hugahe hue. Fatago hutama maisaya yafena tamakesa havi havi hutama nagayama nehua kea havilama hiho. Nagoke tamaku tamakesale kea o'vaitama tamaipamo falu nehinage-tama maiho. Na'a nehisageno hau ayamopafi nehainageno kanale falu yamona aepa'amo'a Anumaya Koti'a tamakai'ene maigahie.

¹² Tamakaya nagoke nagoke'mo-gatama tamayana o'ami a'ami hutama maiho. Muki'a Anumaya Koti anagala nagai'ene maine'ya tamakaifena "Felugae." hu'ya hu falu fala hunelamatae.

¹³ Anumayati Yisasi Kalaisi'a kayone hulamatesia yama'a tamaminageno Anumaya Koti'a tamakaifena hau ayamopafi nehainageno Alu Aotage Avamu'mo'a tamakai'ene tokaeno maisigetama nagopi maisae hu'na nunamuna nehue. Ke'nia male ha'no hie. Nagai'ni nagia Polo'nae.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 18 Apr 2025 from source files dated 31 Aug 2023

55807fd5-1005-5405-89da-5533a7950c65